

**Date – 06/10/2024**

**Time - 7:30 -7:40Hrs**

## **REGIONAL NEWS BULLETIN**

### **HEADLINES (MORNING)**

1. Mizorama kuthnathawk mi Nuai 1 Sing 1 leh 279-in PM Kisan hnuaiiah Direct Benefit Transfer (DBT) hmangin sum an dawng tawh.
2. Mizoram sorkarin State Human Rights Commission din a remti.
3. Champhai Hnahsin Kût chu kalphung thara sorkarin Tourism kalpui a tum dan hlimthla lanna a ni, a ti.



### **PM KISAN**

Mizorama kuthnathawk mi Nuai 1 Sing 1 leh 279-in PM Kisan hnuaiiah Direct Benefit Transfer (DBT) hmangin sum an dawng tawh.

Prime Minister Narendra Modi-a'n nimin khan Washim, Maharashtra atangin kuthnathawktute tuamhlawmna scheme pui ber ni-a ngaih, PM Kisan hnuaiia 18th Instalment sum chu kuthnathawktu mi Vaibelchhe 9 leh Nuai 4 chuang hnenah DBT kaltlangin a sem chhuak a. He hamthatna dawng zingah hian Mizorama kuthnathawk mi Nuai 1 Sing 1 leh 279 te pawh telin an hnenah hian a vaiin Cheng vaibelchhe 31 Nuai 6 Sing 7 Sang 8 leh 200 semchhuah a ni a, an Bank account-ah DBT hmangin a lut. Hei hi kumina 2nd installment a ni.

PM Kisan hi kum 2019 atanga bul tan niin khawvela kuthnathawktute puala DBT kaltlanga hamthatna lian ber nia sawi a ni a; 'Digital Marvel' lian ber tih a ni bawh. He scheme-a inziaklutte chuan thla li danah Cheng 2,000 zel dawngin a vaiin kum khatah Cheng 6,000, an Bank account-ah Direct Benefit Transfer hmangin an dawng thin a ni.



### **DC&MA MINISTER**

District Council & Minority Affairs Minister Pu C. Lalsawivunga'n Mizo hnam anga dinchhuah theih nan inunauna leh inpumkhatna dah pawimawh a tul, a ti.

Nimina Pâng Zirlai Pawl (PZP), Joint Headquarters Aizawl buatsaih zirlai tharte lawmluhna leh zirlai tithate lawmpuina hun Aizawl I&PR Auditorium-a a hmanpuinaah he thu hi sawiin Pu C. Lalsawivunga chuan, Mizorama chibil leh hnam peng hrang hrang awmte chu Mizo nihnain phuar khawm zel se, inla hrang tham leh inenhrang tham an awm lova, hetia inpumkhat leh lungrual taka an chenho hian hnam zahawm an nih phah a ni, a ti.

Pu C. Lalsawivunga chuan kal khawmte chu hnathawh hreh nei lo tur leh thawk lova awlsam taka sum lak luh tum lo tura fuihin mahni zâwn theuhah taima leh rim taka thawk tur leh a thlawna dawn leh sem ringawt beisei lo turin a chah a. Zirna chu hmasawna rahbi pawimawh tak a nih thu sawiin zirlai kalkhawmte chu

ram leh hnam tan a ni tih hriaa thiamna tak tak nei tura lehkha zira central service-ah mi tam zawk inziaktling thei tura tan la nasa turin a chah bawk.

(CORR)



## SHRC

Tun hnaia Gauhati High Court thupek angin Ningani liam taa Council of Minister thukhawm chuan Mizoram State Human Rights Commission din a remti.

Chief Minister Pu Lalduhoma kaihhruaia Council of Minister thukhawm hian Gauhati High Court-in September ni 6-a thu a pek angin Mizoram State Human Rights Commission din hi a remti a; Gauhati High Court hian hemi din tur hian thla 2 chhung hun a pe a ni.

Gauhati Division Bench, Chief Justice Vijay Bishnoi leh Justice Michael Zothankhuma te kaihhruai chuan Mizoramin Human Rights Commission a din lo chu tha an tih loh thu sawiin hma la vat turin thu an pe a. Court chuan State Human Rights Commission chu thla 2 chhunga din a nih loh chuan Supreme Court thupek angin 1993 Act hnuai hremna na tak a awm dawn niin an sawi a ni.

(DESK)



## TOURISM MINISTER – CHAMPHAI HNAHSIN KÛT

Tourism Minister Pi Lalrinpuii'n, Tourism kalphung tharah tualchhunga chengte hmanga khualzinte hip chu Mizoram sawrkarin a kalpui dawn a, a hlawhtlin theih nan sawrkar leh tualchhung mite tanrual a pawimawh, a ti.

He thu hi nimina Hnahsin Kût, Champhai-a a hmanpuinaah sawiin Minister chuan, sawrkar hmalaknaa khualzin hip tumna chuan ngaia neihna thlenin hlawhtlin tawh lohna a nei thin, a ti a. Mizoram sawrkar chuan Tourism-ah kalphung thar, tualchhunga chengte hmanga khualzin hip a tum dawn tih sawiin mipuite hmalaknaah sawrkar chuan an hnung a dawl thin dawn, a ti a. Hnahsin Kût avangin mi tinin Champhai pan an chak a, kût tan hma hauhva thlenna tur awm tawh lo chuan Kût hlawhtlin zia a lantir a, kalphung thara sorkarin Tourism kalpui a tum dan hlimthla lanna a ni, a ti.

Minister chuan Champhai District chu tihdanglam ngai lo hmunhma mawi, Mizo pi leh pu sulhnu tam ber awmna a nih avangin khualzinte hip turin theihna sang tak a nei a ni, a ti a. Swadesh Darshan 2.0 hnuai h Tourism chawikanna tur hmalakna hrang hrang kalpui thuai tum a ni, a ti bawk.

Champhai chu India leh Myanmar ramri luhka a nih angin ruihhlo do kawngah hmahruaitu ni turin a mi chengte Pi Lalrinpuii chuan a ngen a. Ruihhlo mai bakah HIV/AIDS natna hrikin Mizoramah bu nghet takin a khuar mek tih sawiin, a dona kawngah mimal, pawl, kohhran leh khawtlang tanrual a ngai tak zet a ni, a ti.

Pi Lalrinpuii hian Tourism Department-in Hnahsin Kût puala North Eastern Council atanga an sum hmuh, Cheng Nuai 8 chu Hnahsin Kût Organising Committee kutah a hlan a. Lehkha ziah fel ngaite ziah fel a nih hnuah Cheng Nuai 2 dang pek leh tur a ni.

(DESK)



## HEALTH MINISTER

Health Minister Pi Lalrinpui'n Mizoram sawrkarin thawktu indaih lohna phuhru turin theihtawp a chhuah mek tih a sawi.

Nimina Champhai District Hospital a tlawhnaah he thu hi sawiin Minister chuan, Champhai District Hospital chu Damdawi In fai lawmman 'Kayakalp Award' dawng tawh an nih angin thawktute chu faina leh damlo enkawl kawnga an hnathawh tha te chhunzawm zel turin a chah a. Mizoram sawrkarin thawktu indaih lohna phuhru turin theihtawp a chhuah mek tih sawiin damdawi in hmun hrang hrang tihchangtlun mek a ni, a ti.

Damdawi ina hun a hman zawh hian Pi Lalrinpui hian Champhai Vengsang, Agriculture Rest House hmun hlui muala Convention Center sak tumna hmun a tlawh a. Convention Center hi Swadesh Darshan 2.0 hnuaiyah sak tum a ni a, chak taka hma lak mek a ni.



## **MTDA**

Mizoram Truck Driver Association (MTDA) chuan Dur Lui leh Sairang inkar kawng NH 306 chu, hmalakna a awm loh chuan tlan loh thlenga hma lak an tum tih sawiin tunkar Nilaini hmaa siam tha turin sorkar an ngen.

MTDA hian thuchhuah siamin, Dur Lui leh Sairang inkar NH 306 kawngpui chu a chhiat avangin lirthei khalhtute leh an member-te atangin sawiselna an dawng tam a, an enfiah hnuah kawng chu a chhe hle tih an finfiah a ni, an ti a. Lirthei lian rit phur tan kal reng ngamna chi-a an ngaih loh thu leh kawngpui chhia chu lirthei khalhtute tan nunna chan palh theih hial khawpa chhia a nih avangin sorkar chu tun thla, October ni 9 ral hma ngeia kawngpui chhe zual siam turin an ngen a; hemi hun chhunga hmalakna leh kawng siam hmuh tur a awm loh chuan Mizoram Truck Driver-te rit phura an kal ngam lo a nih pawhin Mizoram Truck Drivers Association chuan mawh an phur dawn lo, an ti a. An tlan loh avanga ei leh barah mipuiin harsatna an tawk palh a nih pawhin Mizoram mipuite hrethiam turin an ngen tih an sawi bawk.

(DESK)



## **ASF**

Vawk pul hri leng mekah Lunglei khawpui veng chhung Bazar tina phalna nei lova vawk talh an awm leh awm loh endik tura din, Joint Inspection Team chuan nimin khan Bazar sa talhna hmuna vawk talh leh vawksa zuarte an enfiah.

Joint Inspection Team hian inkaihhrainain a sawi angin AH&Vety Department atanga hri kai lo an ni tih hriatpuina lehkha nei lova vawk talh an awm leh awm loh an enfiah a, Vawk sa zuar te hian vetty dept atanga lehkha an dawn chu an lo tar hlawm a ni.

Joint Inspection Team hian Lunglei khawpui chhunga veng hrang hrang Bazara vawk talhte chu a remchan danin a hmunah kal chilhin an enfiah thin dawn tih an sawi.

ASF hi tun dinhmun-ah Mizoram District hrang hrangah a la leng mek zel a. AH& Vety hotute hnen atanga thu dawn dan chuan, kumin January atanga nimin thleng khan ASF vanga vawk thi hi 13,798 a tling tawh a. ASF vanga vawk suat tawh zawng zawng chu 22,960 a ni a, nimin khan ASF vanga vawk suat 84 awmin, vawk 12 an thi tih report a ni.



## CADC TO INTRODUCE MIZO LANGUAGE IN SCHOOLS

Chakma Autonomous District Council, (CADC) Executive Committee nimina thukhawm chuan CADC huamchhunga zirna inah Mizo subject telh a remti.

Thuchhuaha tarlan dan chuan CADC huam chhunga sawrkar hnuai zirna in hrang hrang leh Samagra Shiksha hnuai bakah tualchhunga zirna in hrang hrangah Mizo subject chu telh remtih a ni a; primary atanga zirna sang zawk thlengin Mizo subject hi an zir tawh dawn a. Mizoram sawrkar atanga tanpuina an hmuh hunah CADC huam chhunga Mizo tawng zirtirtu tur an la dawn a. Sawrkarah dilna an thehltut tawh tih pawh sawiin bul tan thuai an beisei, an ti.

(DESK)

<><><>